

107 年全國語文競賽客家語朗讀文章國小學生組（海陸腔）

編號 07 號

【願望】謝惠如原作

逐朝晨䟽床，佢會去灶下看有東西好食無？係無，食飯桌頂，阿姆會囡三十個銀分佢買早朝，自家行路去讀書。一杯豆乳、一隻包子，對佢來講係最大个享受，阿姆、阿姊兩儕，毋知有包子好食無？

阿姊國中畢業後，去電毛店做助手，專門摻人客洗頭那毛，一日洗到暗，正賺萬過銀定定，逐擺轉來奈个時節，佢會偷偷仔看佢个手巴掌，幼嫩白淨个手，變到紅紅又起一粒粒个紅粒仔¹，佢問：「阿姊，你个手巴掌會痛無？」阿姊講：「看著老弟煞猛讀書，就毋會痛咧！」有一擺，阿姊个國中導師，來屋下喊佢倒轉學校去讀高中，講這下个社會，愛讀書正毋會分人看毋起。佢聽著阿姊講：「佢愛摻阿姆搯手賺錢，繳老弟讀書。」

在佢三歲時節，負擔屋下經濟來源个阿爸，在建築工地釘枋模，無細義對四樓个鐵架仔頂高橫下來，送到醫院急救兩個零月，不幸過身咧，揸下²年輕个阿姆，還有八歲个阿姐摻佢。暗晡頭，阿

姆長下搯等佢兩姊妹³開聲嗽，年紀較大个阿姊會安慰阿姆，斯愛俚子哀煞猛打拚，雖然無阿爸支持，還係愛生存下去。

逐日天矇光，大武山頂漸漸仔有希望个光線出現，阿姆就去摻人貌事⁴摘菜、剪菁仔，還有果樹洩農藥時，搯手擲塑膠管軟線，斯愛做得賺錢个工作，佢麼个事頭都做。有時閒月無事做，佢會去專做歪事个花店，跔殯葬業扛死老，做假孝女假嗽、假爬、詐意流目汁，所有个打拚就係為了賺加滴細錢。阿姆係一個在台灣無親無戚个印尼客家妹仔，佢个煞猛凝家，分隔壁鄰舍當安謐。

有一擺房東來收屋稅時，講下隻月愛起加一千個銀，阿姆再三哀求屋稅莫起價，婦人家人賺錢無恁容易，還愛畜細人仔，屋主毋肯，還講無起價就請佢兜搬出去，毋好戴咧！阿姆目紅鼻紅大聲嗽，緊嗽喉嚨頭町緊念：「天公爺！哪量時佢个俚仔妹仔正有能力買屋分佢戴，毋使逐隻月納屋稅。」

阿姆、阿姊，你兜講个話佢聽著咧，從今以後佢會煞猛讀書，先培養較好个條件，將來出社會正有辦法賺錢。等佢成人長大時，會買屋分阿姆戴，會繳阿姊去讀書。

¹ 紅粒仔：音 fung liab `er；皮膚上起的紅色小顆粒。

² 揸下：音 fid ha `；丟下。

³ 兩姊妹：音 liong `ji `moi`；這是客家一般習慣的稱呼，不管兄妹、姊弟，均稱「姊妹」，惟全男性時使用「兄弟」，此處指兩姊弟。

⁴ 貌事：音 mau+ she+；包攬工作。